

Saopštenje povodom objavljivanja izvještaja revizije učinka

Sarajevo, 30.12.2016. godina

Ured za reviziju institucija u Federaciji Bosne i Hercegovine proveo je reviziju učinka na temu: „Praćenje poduzetih aktivnosti institucija na osnovu izvještaja“, tri ranije obavljene revizije, i to:

- „Planiranje visokog obrazovanja u Federaciji BiH“, iz 2007. godine;
- „Upravljanje vremenom u procesu eksproprijacije nekretnina pri izgradnji dionica autoceste na Koridoru Vc“, iz 2009. godine;
- „Efikasnost nadležnih institucija u procesu plasiranja federalnih poticaja u primarnoj poljoprivrednoj proizvodnji“, iz 2009. godine.

Cilj revizije je bio da se prikupe informacije i izvrši procjena o stepenu poduzetih aktivnosti od strane nadležnih institucija, na osnovu ranije izvršenih revizija. Navedenom revizijom bi se trebalo osigurati unapređenje buduće prakse postupanja po izvještajima revizije učinka i veći stepen realizacije preporuka.

Obavljenom revizijom utvrđeno je da Parlament Federacije BiH i Vlada Federacije BiH nisu posvetili dovoljnu pažnju razmatranju izvještaja revizije učinka niti osigurali postupanje po datim preporukama. Također je utvrđen nizak stepen postupanja po datim preporukama od strane ostalih institucija kojima su preporuke također bile upućene.

Parlament Federacije BiH je razmatrao i usvojio samo jedan od tri navedena izvještaja, i to: „Planiranje visokog obrazovanja u Federaciji BiH“, a Parlamentarna komisija odgovorna za reviziju, nije vršila praćenje realizacije zaključaka donesenih za navedeni Izvještaj od strane Parlamenta Federacije BiH.

Vlada Federacije BiH je izvještaje revizije učinka razmatrala samo u situacijama kada je isto bilo predloženo od strane ministarstava. **Na ovaj način se nije moglo osigurati poduzimanje svih potrebnih aktivnosti na realizaciji preporuka upućenih Vladi FBiH.**

Rezultati obavljene revizije pokazuju da od ukupno 31 institucije koje su trebale realizovati date preporuke, **samo njih 5 je u potpunosti poduzelo aktivnosti** u cilju realizacije datih preporuka. Djelimične aktivnosti na realizaciji preporuka je poduzelo 11 institucija, 8 je poduzelo početne aktivnosti, dok čak 7 institucija uopće nije započelo aktivnosti na realizaciji preporuka.

Kompletan izvještaj obavljene revizije učinka dostupan je na web stranici Ureda za reviziju institucija u FBiH: www.vrifbih.ba.